

URTEROKO BATZARRA

Urte guztietan lez, aurten be EUSKERAZALEAK TALDEAK bere urteroko batzarra egin dau.

Beste urteetan Karmen'go eleiz-aretoan edo Lasalle'tarrak izan eben ikastetxekoan edo Eskolapoenean egin izan da batzar au, baiña aurten, toki egokiagoa dala uste izanez, geure etxean egin dogu.

* * *

Beti lez, ez da jentetza aundirik batu, baiña batzarra gogoangarria izan da.

Iru zati batez be agertu ziran egitarauan, aurreko batzarraren agiria irakurri ondoren: Batzordeko barriak, diruketa ta gomutaki-itzaldia.

* * *

Batzordeko barriak, lendakari-ordea, Peña'tar Xabier zanaren ordeaz eta maiko bi barritu ziran.

Deia egin zanean eguna izendatuta autagaiak eskatu arren, ez zan agertu zerrendarik eta bertan egin ziran aurkerapenak gogo onez.

* * *

Diruketearen barriak Bilbao'tar Jon Erramun'ek azaldu zituan zeatz eta meatz eta eragozpen barik onartu ebezan batzarkideak.

Arlo onetan etxearen arazoa agertu zan. Gure lan-atxea ugazabak salgai jarri dau eta salneurri egokian erostea ondo litzakela uste eben batzarkideak, eretxi onetan Oleaga tar Jesus aurrerengo zala.

* * *

Gomutaki-Itzaldian Zubiri'tar Iñaki Lendakariak urteko lanaren zeaztasunak agertu zituan, argi ta garbi: Xabier Peña'ren eriotzearen barria, Euskerea irakasteko egindako lanak, argitalpenen artean, egutegia, liburuak, ZER, ipuin-sariketea, KILI-KILI, eta azkenez, artu dan laguntza baten barria.

ZER onetan agertzen da itzandi labur au oso-osoa.

* * *

Itaun-erantzunen artean, Gisasola'tar Imanol adiskidea agertu jakun gure taldean eta, batez be, ZER aldizkarian Ian egiteko asmoaz. Pozgarria izaten da lankide baten eskintza eta pozik entzun genduan Gisasola rena be. Ba-daukagu itxaropena adiskide jator onegaz berba egin eta gure lan-taldea osotzeko.

GOMUTAKIA

XABIER PEÑA

Agur lagun maiteok:

Aurtengo gure txostena, samiñez beterik agertzen da, gure lendakari-orde, Xabier Peña'ren eriotza dala-ta. Ezagutu dogunok, lagun kutun bat galdu dogu; ontasun, jakintza, apaltasun eta borondate onaz osoturiko lagun zintzoa. Nik neuk beintzat esan bear dautsuet ez dodala inoiz asarraturik ikusi, bai ostera, beti irri-barreka. Bere izaeraren ezaugarria, izan be, barruko ontasanaren ispi-llua zan.

EUZKAREA GALTZAILLE

Baiña benetan galdu dauana, gure euskerea da. Bai'e-dira 25.000 euskal ikasle aren irakaspenak artu dabezanak, gure ama ezetsiaren izkuntza ikasten saiatu diranak.

Gizon batek berak bakarrik au burutu aal izateak, bere anditasunaren neurria emoten dau.

Ba-dira gizaki asko lan egiteko gerturik dagozanak, gauzak eta giroak itxura ona darakusenean, baiña gure Xabier'ek egindako lana gure erria lur jota egoanean izan da, euskal-zaletasuna erakustea legeauspena zanean.

Berak euskeraganako maitasun utsaz, indarrak atara ebazan, eta aberriari eskeiñi leikion gauzarik ederrena berak emon eutson: egunerik egun, urterik urte, bere bizitza osoa euskereari eskeiñi, auxe izan da-ta bere bizitzaren maitasuna.

* * *

EREDU

Eredu ona itzi dausku guztioi, bai gizon lez, bai kristiñau lez eta bai elburu bateri eskintzen dautson bizitza osoaren jorana lez.

Agur Xabier, zure errikideek ez dautzue zuk merezi aiña negarrik egingo, baiña ezagutu zaitugunok, gogobiotzean gordeko zaitugu. Goian BegoPeña'tar Xabier.

* * *

IKASTAROA

IKASLEAK

Aurten, 460 ikaslek izena emon dabe euskera-ikastarorako, igaz baiño 100 ikasle gitxiago, eta 1979 urteko beste.

Dirudianez, euskera-ikastaldiak ugaritu egin dira, leku askotan orain irakasten dalako-edo, eta au dala-ta,

ez dogu kezkatu bear, gero ta euskera geiago ikasten dalako. Gure ustez, kopuru orretan jarraituko dogu aurreantzean.

UDAKO IKASTAROA

1979'ko urtean lez, igaz be oiko ikastaroa amaituta, Garagarrilla'n uda-ikastaroa izan dogu, Ibarra'tar Bernardo'ren ardurapean. Aurten 80 ikasle etorri jakuz, au da, igaz (65) baiño geiago.

Ba-dirudi ikastaro onek arrera ona izan dauala.

Iru maillatakoa izan da, ta saria 1.500 pezetakoa.

* * *

ALKAR-IZKETA MAILLA

Malax-etxebarria'k zuzenduta, alkarrizketako maila, 15 bat lagunegaz izan dogu. Dirudianez ikastaro onek ikasleen artean arrakasta polita lortu dau.

Aurten ez dogu izan igaz asi genduan oarkari (monitor)en ikastaroa. Sail onek ez dau jende naikorik erakarrri, eta gure ustez ez dau merezi izan jarraitzea.

* * *

ARGITALPENAK

EGUTEGIA

Aurten geuk eginda ta Bizkai'ko Kutxak argitaratua, agertu da 1981'ko egutegia.

40.000 argitaratu dira, eta Kutxa'k Bizkaia'n zear daukazan ordeztetxeetan banandu izan dira.

Geuretzat 3.000 gorde doguz.

Aurten be asmotan gagoz, Olazar'tar Martin'en ardurapean datorren urtekoa gertutzeko eta arazo onetan diardugu.

* * *

LIBURUAK

«Alkarrizketa» idaztitxutik geuk 500 ale banandu doguz.

Eskaera asko izan doguz.

Idaztitxo au Gipuzkoa'ko Bankuak atara dau.

«Iniciacion», 2.500 ale argitaratu doguz.

«Euskalerriko ipuiñak», 2.500 ale argitaratu doguz.

«Ikasbide Laburua», 1.200 (Peña'tar Xabier'enak) etorri yakuz gure ardurapean saltzeko.

* * *

GURE ALDIZKARIA

ZER ALDIZKARIAK BETIKO ITXURAN DARRAI.

Illero-illero agertzen da, eta gai ta idazleakaitik, be-reala igartzen da artutako bidetik oztopo barik joango dala, baiña zuen lekuko gure aldizkariaren ontasuna epaitzeko.

Beste urtetan lez, Bizkai'ko ta Bilbao'ko Aurrezki Kutxak bene-benetan lagundu dauskuela esan bear dogu.

* * *

IPUIN - SARIKETEAK

Igaz, ipuin-sariketa bat antolatu genduan, 25.000, 15.000 eta 10.000'ko sariakaz, au da, iru sari. Ogeitaz ipuin aurkeztu ziran, eta irabazle oneik azaldu ziran:

1'goa —Etxebarria Ayesta'tar Juan Manuel'ek, «Bizkaitz» ipuiñaz.

2'garrena —Estonba'tar Manuel, «Mamurrak» ipuiñaz.

3'garrena —Bilbao'tar Nikola, «Guda Baltzaren Ondorenak» ipuiñaz.

Ipuin oneik ZER'en argitaldu ziran.

* * *

KILI - KILI

Ikastaroa. Lengo urtean, Consejo General Vasco'k ezikuntza-arloan ezer ez eukala-ta, Kili-Kili'k txosten bat egin eutson, ume-aldizkari au zer dan azalduz, eta talde onek 16 urtez metaturiko bizi-ikaspen edo esperientzia eskiñiz.

Zoritxarrez baiña, ez da erantzupenik etorri. KILI-KILI ume aldizkariak aurrera egin dau betiko antzera.

KILI-IRRATIA: Aurten be, ERRI IRRATIAREN BIDEZ, larunbat guztietan ordu bateko jardunaldia izan dabe Bizkai'ko ume euskaldunak. Askok entzuten dabe asteroko irrati-une au.

KILI-KILI EGUNA: Orrilla'ren 25'gnean Iruña'n ospatu zan igazko Kili-Kili Eguna.

Jendetza andia batu zan, eta bertako euskeraren aldeko taldeen laguntasun andirik izan ez arren, Donostia'koa baizen ondo azaldu zan jaia au.

Bizkai'tik berrogei ta amar autobus joan ziran.

**

LAGUNTZAK

Bizkai'ko Aldundiko Aziketa-Jakintza ta Birreuskeratze Saillak, it onetako 2'gnean 700.000 pezetako laguntza guri emotea erabagi dabela jakinerazo dausku. Uste dogu luzaro barik laguntza ori eskuan izango dogula.

Besterik ez, bazkide maiteok.

ZUBIRI'tar Iñaki'k